

ATIKU-MITSHUAP

Etuat Rich

Shiuennanu, apu tat atik^u. Ek^u iteu ne napeu :

— Natuapamatau ma atik^u, iteu, tau anite. Nete uitshit natuapamatau.

— Apu tshika tshi aitian nin tanite tshessinat, itiku.

— Mauat, iteu, muk^u eishinuin eukuan tshe itin. Tshika tshi

aitin. Uitsheui.

Ekue uitsheukut tapue.

Tshatuteht, nete ma ekue aituteht, pipimuteuat, apu nita tshekuannu uapatahk. Nete ma pessish etakuannit nenu tushkapatamuat. Nenu uiapatahk tapue, nasht uapanu nenu utshinu.

— Ekute anite etakuannit uitsh, iteu.

Ekue ituteht. Mishta-mamishishtuat matsheshuat, amu mishta-mishishtu iapit. Ekue nipaiaht nenua, nenua matsheshua nipaieuat.

Ui tshitinikuat ekue nipaiaht. Kassinu tshekuan mamishau. Ekue

ituteht nenu meshkananu etamunit. Mishta-mutanauatshishimu anite ashinit,

atikuss ne shatshishkuepatashu, shashatshishtikuanepatashu eshpish

mutanauakamunit anite ashinit nenu umeshkanau ne atik^u.

Ekue peshuapatahk nenu mitshuapinu. Ekue shepanit ne mitshuap,

shepanu ne mitshuap. Ekue pitutsheht.

Mishta-mitshetu atik^u anite pitukamit.

— Tanite utshimau etat ? iteu nenua atikua peik^u.

Ekue atuaimakut nete, apu aimikut nasht, apu aimikut nenua. Ekue atuaimakut anite tshishtukanit, ekue natak nenu tshishtukannu. Ekue shepannit, ek^u uiapamat nete etaniti tapue. Nete miam utshimau eukuan eshinakushiniti, innua. Innu ka-ishinueua, akaneshau ishinueu. Uapameu aitumunua anite ushatshipashuna. Ekue natahk ekue pitutsheht. Ekue minakaniht mitshiminu, assikut mishta-mishanu eshamakaniht. Ekue mitshishuht.

— Muk^u eishinuin tuta, iteu.

Ek^u tshitauat nenu umitshimauau nutim, mishta-mishanu assikunu. Nutim nenu tshitauat umitshimauau. Ekue uepimitamuat utassik^u.

— Ninimish, ume tshitassik^u ! iteu.

Ekue petutet ne utshimau, pet takuneu pashetikusha ekue minat nenua napeua. Ekue unuiht. Nenua manakanit ekue uitsheuat nenua.

Katshi unuiht nete, eukuan eshpish uapamaht. Eukuannu nenu pemuteht, nenua utshua unishkut anite muk^u tatshishinuat mani, ekue ashupaniht nenu kutakanu utshinu. Iapashapiht anite tshekat tshe takushiniht, mishta-mitshetinua atikua. Nenu ma tekushiniht, ek^u neuauakanit ne atik^u. Mishta-nipaiakanu.

Namaieu atanukan, innuat an shashish.

Shash.